



**TESTU BATEGINA**, uztailaren 2ko 164/2002 DEKRETUarena, Eibarko Egoitza-Zentroa sortu eta Eibarko Hezkuntza-Esparruko administrazio-egitura eta -antolaketa eta Eibarko Egoitza Zentroan ikasleak onartzea zehazten duena, otsailaren 22ko 24/2011 Dekretuak xedatzen dituen aldaketekin.

## LEHENENGO KAPITULUA

### XEDAPEN OROKORRA.

**1. artikulua.**– Eibarko Egoitza-Zentroa sortzea eta Eibarko Hezkuntza-Esparruko administrazio-egitura eta -antolaketa arautzea da Dekretu honen xedea.

**2. artikulua.**– Eibarko Egoitza-Zentroa sortzen da, zentro hori publikoa da eta Hezkuntza, Unibertsitate eta Ikerketa Sailaren menpean dago. Horren helbidea Eibarko Otaola hiribidea 29 da (Gipuzkoa), eta horren Kodea 013173 da.

**3. artikulua.**– 1.– Honako hauek osatzen dute Eibarko Hezkuntza-Esparrua: bere gobernu orokorreko organoek, artikuluko 2. atalean agertzen diren zentroek eta horien guztien instalakuntza eta bulego komunek.

2.– Eibarko Hezkuntza-Esparrua osatzen duten zentroak, honakoak dira:

a) "Uni Eibar-Ermua" Bigarren Hezkuntzako Institutua.

b) Eibarko Egoitza-Zentroa.

c) Indarrean dagoen legeriarekin bat etorriz, geroan unibertsitateaz kanpo sor daitezkeen ikastetxeak.

3.– Eibarko Hezkuntza-Esparrua organikoki Hezkuntza, Unibertsitate eta Ikerketa Sailaren menpean izango da.

**4. artikulua.**– Eibarko Hezkuntza-Esparruaren oinarritzko helburuak honakoak dira:

a) Esparruaren ikastetxeetako mailetarako ezarritako irakaskuntza egokiak irakastea.

b) Ikasleei ostatu-zerbitzua ematea eta, prestakuntzan ahalik eta etekinik handiena atera dezaten, hezkuntzako jardunaren garapenak dakartzan eskakizunetarako egokitzen diren zerbitzu gehigarriak eskaintzea.

**5. artikulua.**– 1.– "Uni Eibar-Ermua" Bigarren Hezkuntzako Institutuan ikasleak onartzea Euskal Autonomia Erkidegoko Bigarren Mailako Hezkuntzako ikastetxe publikoetan ikasleak onartzeko arau orokorraren arabera egingo da.

2.– Eibarko Hezkuntza Esparruko Egoitza Zentroan egoitza izango duten pertsonen onarpena Dekretu honetako Laugarren Kapituluaren xedatutakoaren bidez arautuko da.



3.- Eibarko Hezkuntza-Esparruan euren egoitza etorkizunean jar dezaketen unibertsitateaz kanpoko ikastetxeetara ikasleak sartzea onesteko, ikastetxe horiek ikasleak onartzeko izango dituzten arau orokorrak erabiliko dira.

**6. artikulua.**– Eibarko Hezkuntza Esparruak aurrekontua eta administraziorako eta zerbitzuetarako langileak izango ditu izendatuta, Esparruko eta hura osatzen duten zentroetako zerbitzuak betetzeko.

**7. artikulua.**– Dekretu hau indarrean jartzen denean Eibarko Hezkuntza Esparruan behin betiko destinua duten administraziorako eta zerbitzuetarako langileek, euren atxikipen eta lan-egoerari eutsiko diete.

## BIGARREN KAPITULUA.

### EIBARKO HEZKUNTZA-ESPARRUKO GOBERNU OROKORREKO ORGANOEI BURUZKOA.

**8. artikulua.**– Eibarko Hezkuntza Esparruko zuzendaritza-organoak hauek dira: Zuzendaritza Kontseilua eta Administrazioa eta Zerbitzuak Kudeatzeko Unitatearen burua.

**9. artikulua.**– Zuzendaritza Kontseiluak du Eibarko Hezkuntza Esparruaren zuzendaritza orokorraren ardura.

**10.1. artikulua.**– Honako hauek osatuko dute Eibarko Hezkuntza Esparruaren Zuzendaritza Kontseilua: Administrazioa eta Zerbitzuak Kudeatzeko Unitatearen buruak, Eibarko Egoitza Zentroko zuzendariak, “Uni Eibar-Ermua” BHIko zuzendariak, eta, Dekretu honetako 3. artikulua 2. atalean xedatutakoaren arabera, etorkizunean Eibarko Hezkuntza Esparrukoak izan daitezkeen ikastetxe publiko ez unibertsitarioetako zuzendariek.

2.- Eibarko Hezkuntza Esparruko Zuzendaritza Kontseilua hilean behin bilduko da gutxienez, edo kideetako batek eskatzen duenean. Kontseilua osatzen duten pertsona guztiek hitz- eta boto-eskubidea izango dute. Erabakiak hartzeko aski izango da gehiengo soila.

**11. artikulua.**– Eibarko Hezkuntza Esparruko Zuzendaritza Kontseiluaren ardura izango dira egiteko hauek:

a) Eibarko Hezkuntza Esparrua ofizialki ordezkatzea. Zuzendaritza Kontseiluak kasu bakoitzean egiteko hau bertako kideetako baten esku utziko du.

b) Hezkuntza Esparruko zerbitzu, espazio eta baliabide komunak zehaztea.

c) Hezkuntza Esparruko zerbitzuak eta instalazioak eta erabilera komuneko espazio, eraikin eta eraikuntzen erabilera zuzentzea eta koordinatzea.



d) Hezkuntza Esparruaren aurrekontua onartzea, aldi berean aurrekontu horren jarraipena egitea eta bete egin dela berrestea.

e) Hezkuntza Esparruko instalazioetako lanak eta hobekuntzak egiteko beharrezkoak diren inbertsioak onartzea eta ikuskatzea, lehentasunak finkatzea eta horien segimendua egitea.

f) Hezkuntza Esparruko zerbitzu eta baliabide komunen jardura ekonomikoa eta administratiboa koordinatzea eta modu egokian kudeatzen direla zaintzea.

g) Hezkuntza Esparrura atxikitako administrazioko eta zerbitzuetako langileen lan-antolaketa onartzea eta koordinatzea, betiere indarrean den legedia eta langile horien lan-eskubideak errespetatuz. Langile horien artean lanak banatzeko irizpide orokorrak zehaztea eta lan horiek betetzeko irizpideak finkatzea. Irizpide horiei jarraituz, Administrazioa eta Zerbitzuak Kudeatzeko Unitateko buruak hartutako erabakiak berrestea edo, hala badagokio, egoki iritzitako aldaketak erabakitzea.

h) Hezkuntza Esparruz kanpoko taldeei bertako gela, instalazio eta zerbitzu komunak erabiltzeko baimena ematea, erabilera hori arautzen duen maiatzaren 6ko 76/2008 Dekretua aintzat hartuta.

i) Obra-kontratuak eta zerbitzu-hornidura kontratuak bete beharreko baldintzen irizpideak zehaztea eta baldintza horiek aldatzeko proposamenak egitea, bere eskumenen barruan.

j) Administrazioa eta Zerbitzuak Kudeatzeko Unitateko buruak onartutako gastu-baimenak eta ordainketa-aginduak ikuskatzea eta haiek berrestea, edo, hala badagokio, egoki iritzitako aldaketak egitea.

k) Hezkuntza Esparruaren prestakuntza-jarduerak eta eskolaz kanpokoak (esparruko ikastetxe guztietarako komunak direnak) koordinatzea, arlo komunak modu egokian erabili ahal izateko, ikastetxeetako zuzendaritza-organismoek beren eskumenen baitan izan ditzaketan eskuduntzetan eragin gabe.

l) Eibarko Hezkuntza Esparruan eta Euskal Herriko Unibertsitatean, bietan, aldi berean eragina duten zerbitzu orokorrak elkarrekin erabiltzeko modua koordinatzea EHUko organoekin.

m) Indarrean diren legeak eta gainerako xedapenak betetzea eta betearaztea eta zuzendaritzaren eskumeneko esparruan zuzen aplikatzen direla zaintzea.

n) Arau bidez emandako gainerako eginkizunak.

**12. artikulua.**– Eibarko Hezkuntza Esparruak Administrazioa eta Zerbitzuak Kudeatzeko Unitatea izango du. Administrazioko eta Zerbitzuetako tekniko bat izango da Unitate horren burua.



**13. artikulua.**– Administrazioa eta Zerbitzuak Kudeatzeko Unitatearen buruak izango du alderdi ekonomikoak, langileenak eta Hezkuntza Esparruko zerbitzu eta instalazio komunak kudeatzeko ardura, Zuzendaritza Kontseiluak onartutako irizpideak eta organo horrek berak hitzartutako Akordioak aintzat hartuta.

**14. artikulua.**– Administrazio eta Zerbitzuen Kudeaketarako Unitatearen buruak egiteko hauek izango ditu:

a) Hezkuntza Esparrurako aurrekontu orokorra prestatzea, Zuzendaritza Kontseiluak onar dezan.

b) Hezkuntza Esparruaren aurrekontua betetzen dela segimendua egitea eta zaintzea, gastuak baimentzea eta gastu horien ordainketak agintzea, Zuzendaritza Kontseiluak onartutako irizpideak aintzat hartuta, aldi behin organo horri hartutako erabakien berri emanez eta, hala badagokio, erabakiak aldatuz, organo horrek onartutako moduan, zentro bakoitzeko zuzendaritza-organoei gai horretan izan ditzaketen eskuduntzetan eragin gabe.

c) Kudeaketa ekonomikotik sortutako kontabilitatea zaintzea.

d) Hezkuntza Esparruaren inbentarioa egitea eta eguneratuta edukitzea. Esparruko Zerbitzu, instalazio, eraikin eta eraikuntzetatik inbentario batean sar daitezkeen materiala jasoko da inbentarioan.

e) Hezkuntza Esparruko liburuak eta artxibo orokorrak zaintzea.

f) Kontratazioak, inbertsioak eta materiala erosteko proposamenak prestatzeko egin beharrekoak egitea.

g) Hezkuntza Esparruko kontratuak eta zerbitzuen prestazioa betetzen direla zaintzea.

h) Hezkuntza Esparrurako hautatutako administrazio eta zerbitzuetako langileen buru izatea, Zuzendaritza Kontseiluak onartutako irizpideei jarraituz, aldi behin organo horri hartutako erabakien berri emanez eta, hala badagokio, erabakiak aldatuz organo horrek onartutako moduan. Langile horien nominak, administrazio-egoerak eta bestelakoak kudeatzea eta ordutegia betetzen dutela zaintzea.

i) Administrazio- eta ekonomia-lan orokorrak antolatzea eta agintzea eta kudeaketan zer lehentasun dauden adieraztea.

j) Hezkuntza Esparruko jardueren urteko memoria egitea bere eskumeneko arloan eta Zuzendaritza Kontseiluaren zuzendaritzapean.

k) Hezkuntza Esparrua osatzen duten ikastetxeei beren aurrekontua betetzeko zereginean laguntzea, baita zentro horietako obrekin eta zerbitzuen prestazioarekin loturiko beste zereginetan ere.



l) Zuzendaritza Kontseiluak haren eskumeneko arloan agindu dakizkiokeen eginkizunak eta ardurak eta araudiari jarraituz egokitzen zaizkionak.

## **HIRUGARREN KAPITULUA.**

### **EIBARKO HEZKUNTZA-ESPARRUKO ZENTROETAKO GOBERNU ORGANOEI BURUZKOA.**

**15. artikulua.**– 1.– Euskal Autonomia Erkidegoko unibertsitateaz kanpoko ikastetxe publikoetarako orokorrean ezarritako taldeko aginte-organismoak eta lagun bakarreko aginte-organismoak izango ditu "Uni Eibar-Ermua" Bigarren Hezkuntzako Institutuak ere.

2.– Jorratzeko gaiak horrela eskatuz gero, "Uni Eibar-Ermua" Bigarren Hezkuntzako Institutuko zuzendariak Hezkuntza-Esparruko gobernu orokorreko organoei dei egin ahal izango die ikastetxeko ordezkari-organismo gorenaren bilkuretan parte hartzeko; horiek hitz egiteko eskubidea izango dute, baina ez botorik emateko.

**16. artikulua.**– Eibarko Egoitza-Zentroak Hezkuntza, Unibertsitate eta Ikerketa Sailak zehaztuko dituen taldeko aginte-organismoak eta lagun bakarreko aginte-organismoak izango ditu.

## **LAUGARREN KAPITULUA**

### **EIBARKO EGOITZA ZENTROAN IKASLEAK ONARTZEKOARI BURUZKOA**

**17. artikulua.**- Egoiliarren plaza kopurua Ikastetxeetako zuzendariak erabakiko du urtero, Egoitza Zentroaren edukiera aintzat hartuta.

**18. artikulua.**- Eibarko Egoitza Zentroan onartuak izateko aukera izango dute eskualdeko ikastetxeren batean dagokion ikasturtean ikasketak egiteko matrikulatuta dauden edo onartuak izan diren pertsonak. Ikastetxe hauetan, hain zuzen:

- Eibarko Industria Ingeniaritza Teknikoko Unibertsitate Eskola.
- Eibarko "Uni Eibar-Ermua" BHI.
- Eibarko "Arma Eskola" GLHBI.
- Eibarko "Ignacio Zuloaga" BHI.
- Elgoibarko "Elgoibar-Arreiturre" BHI.
- Elgoibarko "Meka" GLHBI.
- Elgoibarko "Makina Erreminta" BHI.
- Etorkezunean Eibarren eta Elgoibarren unibertsitate-hezkuntza, batxilergoa edo Lanbide Heziketako Prestakuntza Zikloak irakasteko ezar daitekeen beste edozein ikastetxe publiko.

Ez dute baldintza hori bete beharko terrorismoaren biktimei laguntza integrala emateko sistema garatzen duen azaroaren 9ko 290/2010 Dekretuaren 28.2 artikuluan zehaztutako kasuetan dauden pertsonak, ez eta etxeko tratu txarren biktimek eta haien adin txikiko seme-alabek.



**19. artikulua.-** Ikastetxeetako zuzendariak emandako Ebazpenaren bidez arautuko dira ikasleak onartzeko prozedura, prozedura hori gauzatzeko epeak, eskaerak aurkezteko epeak, era eta lekua, eskaerekin batera aurkeztu beharreko dokumentazioa, onartutako eta baztertutako pertsonen behin-behineko zerrenda argitaratzeko eta zerrenda hori helegiteak aurkezteko epeak eta behin betiko zerrenda argitaratzeko epeak. Hezkuntza eta Unibertsitate Sailak eskumena izango du eskabidea aurkeztu duten pertsonen emandako datuak egiazkoak direla egiaztatzeke beharrezkoak diren eginbeharrak egiteko.

**20. artikulua.-** 1.- Aurreko ikasturtean Eibarko Egoitza Zentroan egoiliar izan ziren pertsonen plaza modu automatikoa berrituko da, beti ere Dekretu honen 18. artikuluan xedatutako baldintza betetzen jarraituz gero eta Zentroaren Antolaketa eta Funtzionamendu Araudian iraupenerako zehaztutako baldintzak betez gero.

2.- Eskaera lehenbizikoz egin duten pertsonak onartzeko, berriz, eskabide guztiei erantzuteko adina egoitza-plaza daudenean Dekretu honen 18. artikuluan xedatutako baldintza betetzen duten guztiak onartuko dira. Eskabideak egoitza-plazak baino gehiago direnean, lehenik eta behin plaza bana esleituko zaie terrorismoaren biktimei laguntza integrala emateko sistema garatzen duen azaroaren 9ko 290/2010 Dekretuaren 28.2 artikuluan zehaztutako kasuetan dauden pertsonen. Gainerako plazak esleitzeko Dekretu honen Eranskinean zehaztutako baremoa aplikatuko da eta hortik ateratako ordenaren arabera esleituko dira plazak. Honako hauek izango dira baremoaren irizpideak:

- A) Familia-unitatearen urteko errenta.
- B) Etxebizitzaren urruntasuna.
- C) Zentroan egoitza duten anai-arrebak izatea.
- D) Familia ugariko kide izatea.
- E) Ezgaitasuna.

Berdinketarik gertatuko balitz, aurreko atal bakoitzean lortutako puntuazio handiena aintzat hartuta eta atal horiek adierazita dauden ordenari jarraituz ebatziko da plaza(k) nori esleitu. Berdinketak iraungo balu, Eibarko Egoitza Zentroko zuzendariak zozketa publikoa egingo du kontua ebatzeko, eta emaitza zentro bereko idazkariak ziurtatuko du. Onartzeko prozesua Hezkuntza, Unibertsitate eta Ikerketa Sailak diseinatutako prozedura informatizatu baten bidez egiten bada, zozketa publikoaren ordez dagokion informatika-aplikazioak berak egindako ausazko prozedura erabiliko da.

**21. artikulua.-** Egoitza-plazak banatzeko baremazioa eta proposamena Hautaketa Egiteko eta Plazak Esleitzeko Batzorde batek egingo du. Eta batzorde horrek berak zenbait ordezkari izendatuko ditu, gerta litezkeen hutsuneak betetzeko. Honako hauek izango dira batzorde horretako kideak:



– Ikastetxeetako zuzendaria edo hark ordezko izendatzen duena; bera izango da Batzordeko presidentea.

– Eibarko Hezkuntza Esparruko Egoitza Zentroko zuzendaria edo hark ordezko izendatzen duena.

– Eibarko Hezkuntza Esparruko Egoitza Zentroko idazkaria; bera izango Batzordeko idazkaria, ahotsarekin baina botorik gabe.

**22. artikulua.-** Behin eskaerak barematuta eta plazak banatuta, Eibarko Egoitza Zentroko iragarki-oholean argitaratuko da onartutako eta baztertutako pertsonen zerrenda. Eskaerak barematu behar izan badira, baremoaren atal bakoitzean lortutako puntuak eta guztizko puntuazioak adieraziko dira zerrenda horretan.

Zerrenda horiek behin-behinekoak izango dira, eta helegitea aurkezteko aukera izango da Hautaketa Egiteko eta Plazak Banatzeko Batzordearen aurrean, zentroan bertan aurkeztutako idatzi baten bidez.

Behin aurkeztutako helegiteak ebatzita, onartutako eta baztertutako pertsonen behin betiko zerrenda argitaratuko da Eibarko Egoitza Zentroko iragarki-oholean. Era berean, itxaron-zerrenda ere argitaratuko da, behar den moduan ordenatuta. Onartutako pertsonen zerrendan gerta daitezkeen hutsuneak betetzeko, itxaron-zerrendan dauden pertsoneri deituko zaie, zerrenda horretan dauden ordenari jarraituz.

Interesdunek onartutako eta baztertutako pertsonen behin betiko zerrendaren kontra gorako errekurtoa jartzeko aukera izango dute Hezkuntza sailburuordearen aurrean. Hilabeteko epea izango dute horretarako, zerrenda argitaratu eta hurrengo egunetik hasita.

**23. artikulua.-** Dekretu honen 18. artikuluan adierazitako baldintza betetzen duten pertsoneri plazen esleipena proposatu ondoren, egoitzan plazarik geratuz gero, Hautaketa Egiteko eta Plazak Esleitzeko Batzordeak baldintza hori bete ez arren eskabidea egin duten beste zenbait pertsona onartzeko proposamena egin ahal izango dio Ikastetxeetako zuzendariari. Beste baldintza hauek betetzen dituzten pertsonak, hain zuzen: inguruko enpresa, ikerketa-zentro edo ikastetxeren batean praktikak, lankidetzaren beken laguntzarekin ikerketa-lanak edo karrera amaierako proiektuak egiten ari direnak, Eibarko Hezkuntza Eskola Ofizialeko mintzalagunak eta Hezkuntza, Unibertsitate eta Ikerketa Sailerako interesekoak izan daitezkeen antzeko beste kasu batzuk.

**24. artikulua.-** Egoitza Zentroak data batzuk jarriko ditu onartutako pertsonak egoitzara joateko, ikasketak egiten dituzten ikastetxeko egutegia aintzat hartuta. Emandako data horietan onartutako pertsonak ez badira egoitzara joaten, egoitza-plazaz gozatzeko eskubideak galduko dituzte, behar bezala justifikatutako ezinbesteko kasuetan izan ezik.

Egoitza-plaza duten pertsonen Eibarko Egoitza Zentroko barnetegi-arauak bete beharko dituzte.



**25. artikulua.-** Deialdia erabat ebatzi ondoren, plaza hutsik geratuz gero, Egoitza Zentroko zuzendariak egoitzan beste zenbait pertsona onartzeko baimena eman ahal izango du, eskabidea egiten duten unetik ikasturtea amaitu arte; dagokion eskabidea egin eta Dekretu honen 18. artikuluan edo 23. artikuluan zehaztutako baldintzak betetzen dituzten pertsonak, hain zuzen. Egoitza Zentroko zuzendariak egoitzan plaza hartu duten pertsonen zerrenda helarazi beharko dio berehala Ikastetxeetako zuzendariari.

Era berean, ikasturteko edozein unetan, Egoitza Zentroko zuzendariak aukera izango du aldi baterako dauden pertsonak denbora-epe jakin batean egoitzan onartzeko, beti ere plaza hutsak egonez gero eta aldi baterako okupazio hori ikasle egoiliarren eskubideekin bateragarria izanez gero.

Beren jarduerak eta programak gauzatzeko aldi baterako egoitzako plazak eta jangela-zerbitzua behar dituzten pertsonen eta hezkuntza, gizarte, kultura, kirol eta antzeko beste arlo batzuetako elkarteei emango zaizkie baimen horiek. Baimen horiek ematerakoan, lehentasuna emango zaie beti eskabidea hezkuntza arloko jarduerak eta programak gauzatzeko egiten duten pertsonen eta elkarteei; hala nola, Bidaia Eskolei, Eskola Trukeei, Europako Programei, etab.

Aldi baterako egoiliarren onarpena baimentzeko ez da beharrezkoa izango pertsona horiek Dekretu honen 18. edo 23. artikuluan zehaztutako baldintzak betetzea.

Egoitza Zentroko zuzendariak aldi baterako onartutako pertsonen zerrenda helaraziko dio Ikastetxeetako zuzendariari, eta noiztik noiz arte onartuak izan diren jakinaraziko dio. Jakinarazpen hori gutxienez urtean behin bidali beharko du egoitzako zuzendariak, eta Ikastetxeetako zuzendariak eskatzen duen aldiro.

Egoiliar ez diren beste pertsona edo elkarte batzuek uneren batean Egoitza Zentroko lokalak eta gelak erabiltzekotan, Hezkuntza, Unibertsitate eta Ikerketa Sailaren mende dauden ikastetxe publiko ez unibertsitario guztientzat orokorrean xedatutakoa bete beharko dute, eta Gipuzkoako Hezkuntzako Lurralde-ordezkararen baimena eskatu beharko dute horretarako.

**26. artikulua.-** Kapitulu honetan xedatutakoaren ondorioz, pertsona fisikoek edo pertsona fisikoen ordezkariak Administrazioarekin dituzten harremanetan, ahoz nahiz idatziz, euskara eta gaztelera erabiltzeko eskubidea bermatuko da, baita hizkuntza bietan arreta jasotzeko eskubidea ere.

## XEDAPEN INDARGABETZAILEA

Irailaren 15eko 299/1987 Dekretua indargabetu egiten da; izan ere, Dekretu horrek Irakaskuntza Integratuetako Eibarko Ikastegia berregituratu zuen, hainbat ikastegi publiko sortarazi zituen eta horiei administrazio-antolaera eman zien. Horrez gain, Dekretu honen aurka doazen maila bereko edo baxuagoko xedapen guztiak ere indargabetu zituen.





## XEDAPEN GEHIGARRIAK

**Lehengoa.**– Abenduaren 18ko 353/2001 Dekretua aldaraziko da; izan ere, Dekretu horren bidez Euskal Autonomia Erkidegoaren unibertsitateaz kanpoko ikastetxe publikoetan, lan legepeko pertsonalarentzat eta Bigarren Hezkuntzako Irakasleriaren Kidegoko, Lanbide Heziketako Irakasleri Teknikoaren Kidegoko eta Erdi Mailako Ikasketetako Institutuetako Irakasleri Bereziaren Kidegoko funtzionarioentzat gordetako lanpostu-zerrenda, 2001-2002 ikasturtekoa, onartu zen. Aldaketa honakoa da:

– "Uni Eibar-Ermua BHI" ikastetxeko Lanpostuen Zerrendatik Lanbide Heziketako Irakasle Teknikoen Kidegoko 5 plaza, "Jarduerak" espezialitatekoak, bereiziko dira; plazok derrigorrezkotasun datarik gabeko 1. hizkuntza eskakizuna daukate. Plaza horiek Eibarko Egoitza-Zentroko irakaskuntzako Lanpostuen Zerrendara pasatuko dira.

Plaza horien izena, hizkuntza-eskakizuna, derrigorrezkotasun data, funtzionarioen zein kidegotan atxiki diren, esleitu zaien berriazko osagarria eta plazok betetzeko sistema, Uni Eibar-Ermua BHI ikastetxeko Lanpostuen Zerrendatik bereiztu ziren lanpostuetarako zehaztu ziren horiexek izango dira, alegia, abenduaren 18ko 353/2001 Dekretuak ezarritakoak izango dira.

**Bigarren.**– "Uni Eibar-Ermua BHI" ikastetxeko "Jarduerak" plazetan atxikitako irakasleak, berez, Eibarko Egoitza-Zentroko "Jarduerak" plazetan atxikiko dira. Atxikipen horrek ez die eragindakoei ezelako aldaketarik ekarriko zerbitzuan emandako denbora zenbatzeari dagokionez.

**Hirugarrena.**– Eibarko Egoitza-Zentroan destinoa duten irakasleek emandako zerbitzuak, irakasle horiek lehiaketa edo deialdietan parte hartzeko ondorioetarako, ikastetxe batean emandako zerbitzutzat hartuko dira.

## AZKEN XEDAPENAK

**Lehenengoa.**– Egoitza-Zentroko gobernu organoak, euren betekizunak eta horiek hautatzeko prozedura Hezkuntza, Unibertsitate eta Ikerketa Sailak emango duen aginduz arautuko dira.

**Bigarren.**– Egoitza-Zentroan lan egiten duten irakaskuntzako langileen betekizunak, eta irakasle gisa dituzten betebeharrak euren lantokiaren ezaugarri berezietarako egokitzeko arauak, Hezkuntza, Unibertsitate eta Ikerketa sailburuak emango duen aginduaren bidez arautuko dira.

**Hirugarrena.**– Hezkuntza, Unibertsitate eta Ikerketa sailburuari baimena emango zaio dekretu hau aplikatzeko eta garatzeko behar diren xedapen guztiak eman ditzan.

**Laugarrena.**– Dekretu hau Euskal Herriko Agintaritzaren Aldizkarian argitaratu eta hurrengo egunean jarriko da indarrean.



## ERANSKINA

### EIBARKO EGOITZA ZENTROAN IKASLEAK ONARTZEKO BAREMOA

#### A) Familia-unitatearen urteko errenta:

- Eskabidea egin duen familia-unitatearen zerga-oinarria urte horretako lanbide arteko gutxieneko soldataren halako bi edo gutxiago bada: 4 puntu.

- Eskabidea egin duen familia-unitatearen zerga-oinarria urte horretako lanbide arteko gutxieneko soldataren halako bi baino handiagoa bada baina soldata horren hirukoitzaren parekoa edo txikiagoa bada: 3 puntu.

- Eskabidea egin duen familia-unitatearen zerga-oinarria urte horretako lanbide arteko gutxieneko soldataren hirukoitza baino handiagoa bada baina soldata horren laukoitzaren parekoa edo txikiagoa bada: 2 puntu.

- Eskabidea egin duen familia-unitatearen zerga-oinarria urte horretako lanbide arteko gutxieneko soldataren laukoitza baino handiagoa bada baina soldata horren boskoitzaren parekoa edo txikiagoa bada: Puntu 1.

#### B) Etxebizitzaren urruntasuna:

- Eskabidea egin duen pertsona Eibartik 80 kilometro baino urrunago dagoen Euskal Autonomia Erkidegoko udalerrri batean bizi bada: 4 puntu.

- Eskabidea egin duen pertsona Eibartik 60 kilometro baino urrunago dagoen Euskal Autonomia Erkidegoko udalerrri batean bizi bada: 3 puntu.

- Eskabidea egin duen pertsona Eibartik 40 kilometro baino urrunago dagoen Euskal Autonomia Erkidegoko udalerrri batean bizi bada: 2 puntu.

- Eskabidea egin duen pertsona Eibartik 20 kilometro baino urrunago dagoen Euskal Autonomia Erkidegoko udalerrri batean bizi bada: Puntu 1.

#### C) Zentroan egoitza duten anai-arrebak izatea

- Egoitza Zentroan jada matrikulatuta dagoen anai-arreba bat edo gehiago izateagatik: 4 puntu.

Irizpide hau aplikatzerakoan, anai edo arrebatzat hartuko dira familia bereko seme-alabak eta abegi-familian dauden pertsonak edo familia horretan adopzio aurreko egoeran daudenak.

#### D) Familia ugariko kide izatea:

- Maila orokorreko familia ugariko kide izateagatik: 1,5 puntu.



- Maila bereziko familia ugariko kide izateagatik: 3 puntu.

E) Ezgaitasuna:

- Eskatzailearena: 3 puntu.

- Aitarena, amarena, legezko tutorearena edo anaia nahiz arrebaren batena: 1,5 puntu.